

**Votaziun dal pievel dals
8 da mars 2015
Explicaziuns dal Cussegl federal**

- 1 Iniziativa dal pievel
«Sustegnair las famiglias!
Nagina taglia sin supple-
ments per uffants e sin
supplements da scolaziun»**
- 2 Iniziativa dal pievel
«Taglia sin l'energia empè
da la taglia sin la plivalur»**



Schweizerische Eidgenossenschaft
Confédération suisse
Confederazione Svizzera
Confederaziun svizra

Davart quai vegni votà

Iniziativa dal pievel «Sustegnair las famiglias! Nagina taglia sin supplements per uffants e sin supplements da scolaziun»

L'iniziativa pretenda distgargias fiscalas supplementaras per famiglias cun uffants. Ella pretenda ch'ils supplements per uffants ed ils supplements da scolaziun vegnian liberads da las taglias sin las entradas.

Emprim
project

Infurmaziuns davart quest project

paginas 4–13

Text da votaziun

pagina 10

Iniziativa dal pievel «Taglia sin l'energia empè da la taglia sin la plivalur»

L'iniziativa vul introducir ina taglia sin las energias betg regenerablas. Il consum d'energia che daventass uschia pli char vegniss cumpensà tras l'abolizion da la taglia sin la plivalur.

Segund
project

Infurmaziuns davart quest project

paginas 14–23

Text da votaziun

paginas 19–20

Iniziativa federala dal pievel «Sustegnair las famiglias! Nagina taglia sin supplements per uffants e sin supple- ments da scolaziun»

La dumonda da votaziun è:

Vulais Vus acceptar l'iniziativa dal pievel «**Sustegnair las famiglias! Nagina taglia sin supplements per uffants e sin supplements da scolaziun»?**?

Il Cussegl federal ed il parlament recumondan da refusar l'iniziativa.

Il Cussegl naziunal ha refusà l'iniziativa cun 159 counter 35 vuschs e 4 abstensiuns, il Cussegl dals chantuns cun 32 counter 13 vuschs senza abstensiuns.

Il pli impurtant en furma concisa

Ils supplements per uffants ed ils supplements da scolaziun èn in sustegn finanzial per famiglias cun uffants. Els cumpenseschan ina part dals custs che van a quint dals geniturs per educar lur uffants. En tut la Svizra ston quests supplements importar almain 200 francs per mais (supplement per uffants) respectivamain almain 250 francs per mais (supplement da scolaziun). Ils chantuns pon fixar supplements pli auts. Tgi che survegn supplements per uffants e supplements da scolaziun ha entradas pli autas ed aumenta uschia sia capaciad economica. Sco otras entradas èn er quests supplements suttamess a las taglias sin las entradas.

Situaziun da partenza

L'iniziativa vul liberar ils supplements per uffants ed ils supplements da scolaziun da las taglias sin las entradas. Uschia stessan quests supplements a disposiziun cumplainamain a las famiglias cun uffants.

Tge vul l'iniziativa?

Il Cussegli federal ed il parlament refusan l'iniziativa. Per l'ina profitassan principalmain chasadas cun entradas autas, sch'ils supplements per uffants ed ils supplements da scolaziun vegnissan liberads da la taglia sin las entradas; chasadas cun pitschnas entradas n'avessan percuter strusch in avatattag u na profitassan insumma betg. Per l'autra perdessan la Confederaziun, ils chantuns e las vischnancas entradas da circa 1 milliarda francs ad onn, sche l'iniziativa vegniss accep-tada. Questa perdita stuess vegnir cumpensada – saja quai cun mesiras da spargn u cun augments da taglia. Finalmain n'en ulteriurs avantatgs fiscals betg necessaris, cunquai ch'i existan gia numerusas mesiras da distgorgia da taglia per chasadas cun uffants.

Puntg da vista dal
Cussegli federal e dal
parlament

Il project da votaziun en detagi

L'iniziativa pretenda ulteriurs avantatgs fiscals per famiglias cun uffants: Ils supplements per uffants ed ils supplements da scolaziun duain vegnir liberads da las taglias sin las entradas. Uschia vul l'iniziativa auzar la capacitat da cumpra da famiglias cun uffants.

Intent da l'iniziativa

La politica da famiglia en Svizra è ina politica sociala. Las chasadas cun uffants vegnan sostegnidias en moda considerable da la Confederaziun, dals chantuns e da las vischncas, er tras differentas distgargias finanzialas. Latiers tutgan per exemplu la reducziun da las premias da las cassas da malsauens per ils uffants e las tariffas socialas en la tgira d'uffants cumplementara a la famiglia.

La politica da famiglia en Svizra

Ils supplements da famiglia, che cumpiglian cunzunt ils supplements per uffants ed ils supplements da scolaziun, distgargian la cassa da las chasadas cun uffants. Quels vegnan finanziads per la gronda part tras contribuziuns dals patruni, ed els guliveschan ina part dals custs che van a quint dals geniturs per educar lur uffants. Damai ch'els completteschan las entradas, èn els suittamess a las taglias sin las entradas. Dapi l'onn 2009 vala en tut la Svizra ina limita minimala per quests supplements: Il supplement per uffants importa almain 200 francs per mai, il supplement da scolaziun almain 250 francs per mai. Ils chantuns pon fixar supplements pli auts. Dapli ch'in terz dals chantuns fa diever da questa pussaivladad.

Situaziun actuala dals supplements per uffants e dals supplements da scolaziun

La politica da famiglia en Svizra cumpiglia er mesiras fiscalas. Quellas èn vegnidias extendidas sistematicamain ils onns passads. L'exempel il pli recent pertutga las mesiras a regard la taglia federala directa ch'en entradas en vigur il 1. da schaner 2011: Quella giada èn vegnidias introducidas l'uschenumnada tariffa da geniturs e la deducziun dals custs cumprovads per la tgira dals uffants tras terzas persunas.

Extensiun da las distgargias fiscalas

Ensemens cun autras deducziuns per famiglias cun uffants (deducziun per uffants, deducziun per premias d'assicuranza e per tschains dal chapital da respargn dependenta dals uffants) resultan distgargias annualas da totalmain circa 900 milliuns francs tar la taglia federala directa.¹ Tar las taglias chantunalas e communalas chaschunan las deducziuns actualas per famiglias cun uffants, tenor stimaziuns da l'Administraziun federala da taglia, distgargias annualas da circa 2,2–2,7 milliardas francs.

Dimensiun da las
distgargias fiscales
actualas

Grazia a las distgargias fiscales menziunadas na paja circa la mesadad da las chasadas cun uffants pli nagina taglia federala directa. Uschia na paja in pèr maridà cun dus uffants ed in salari nagina taglia federala directa fin ad in salari brut da 97500 francs. In pèr maridà che ha dus uffants e dus salaris² e che fa valair custs da 10100 francs per la tgira dals uffants tras terzas persunas, na sto pajar nagina taglia federala directa fin ad in salari brut da 126000 francs.³ Tar las taglias chantunalas e communalas variescha l'autezza da las distgargias pervia dal sistem fiscal federalistic.

Consequenzas da las
distgargias fiscales
actualas

¹ Funtauna: missiva dals 23 d'octobre 2013 tar l'Iniziativa federala dal pievel «Sustegnair las famiglias! Nagina taglia sin supplements per uffants e sin supplements da scolaziun»; Fegl uffizial federal **2013** 8461, particularmain 8468.

² Supposiziun: 70 pertschient dal salari brut veggan cuntanschids d'in genitur, 30 pertschient da l'auter genitur.

³ Funtauna: missiva dals 23 d'octobre 2013 tar l'Iniziativa federala dal pievel «Sustegnair las famiglias! Nagina taglia sin supplements per uffants e sin supplements da scolaziun»; Fegl uffizial federal **2013** 8461, particularmain 8473–8474.

Sche l'iniziativa vegniss acceptada, variassan las distgargias tut tenor il salari brut, tut tenor il dumber e l'autezza dals supplements per uffants e dals supplements da scolaziun e tut tenor il lieu da domicil. Las suandardas tabellas dattan ina invista da las consequenzas per tut las taglias sin las entradas (Confederazion, chantun e vischnanca).⁴

Distgargias, sche
l'iniziativa vegniss
acceptada

Pèr maridà cun in salari e dus uffants

Domicil	Salari brut en francs (incl. supplements per uffants)		
	50 000	100 000	200 000
Midada da la grevezza fiscale tar las taglias sin las entradas en francs			
Basilea	0	-1167	-1795
Bellinzona	0	-834	-1944
Genevra	0	-1630	-2936
Glaruna	-482	-837	-1618
Turitg	-323	-820	-1828

Pèr maridà cun dus salaris e dus uffants

Domicil	Salari brut en francs (incl. supplements per uffants)		
	50 000	100 000	200 000
Midada da la grevezza fiscale tar las taglias sin las entradas en francs			
Basilea	0	-1080	-1592
Bellinzona	0	-304	-1658
Genevra	0	-1193	-2733
Glaruna	0	-730	-1396
Turitg	0	-550	-1584

⁴ Funtauna: calculaziuns da l'Administraziun federala da taglia per l'onn fiscal 2013 davart las summas distgargiadas, en cas che l'iniziativa vegniss acceptada. Supposiziun: En il cas d'in pèr maridà e dus uffants vegni supponi ch'i vegnan fatgs valair ils custs cumprovads da maximalmain 10 100 francs per la tgira dals uffants tras terzas personas; la proporziun da queste dus salaris è 70 a 30 pertschient.

Ils exempels mussan che las distgargias dependan dal salari brut: Pli bass ch'il salari brut è, e main taglias sin las entradas che pon vegnir spargnadas. Percunter s'augmentass la distgargia, pli aut ch'il salari brut è.

Sche l'iniziativa vegniss acceptada, avessan la Confederaziun, ils chantuns e las vischnancas entradas marcantamain pli bas-sas: Las perditas da taglia importassan tut en tut circa 1 milliar da francs.⁵ Uschia avess il maun public a disposizion damain meds per finanziar sias incumbensas. Las perditas stuessan vegnir cumpensadas – saja quai cun mesiras da spargn u cun augments da taglia.

Las entradas autas
vegnissan distgargiadas
il pli fitg

Perditas da taglia,
sche l'iniziativa
vegniss acceptada

⁵ Funtauna: missiva dals 23 d'october 2013 tar l'Iniziativa federala dal pievel «Sustegnair las famiglias! Nagina taglia sin supplements per uffants e sin supplements da scolaziun»; Fegl uffizial federal **2013** 8461, particularmain 8476.



Text da votaziun

Conclus federal

davart l'iniziativa dal pievel «**Sustegnair las famiglias!**

Nagina taglia sin supplements per uffants e sin supplements da scolaziun»

dals 26 da settember 2014

L'Assamblea federala da la Confederaziun svizra,

sa basond sin l'artitgel 139 alinea 5 da la Constituziun federala¹,

suenter avair examinà l'iniziativa dal pievel² ch'è vegnida inoltrada ils 5 da november 2012

«Sustegnair las famiglias! Nagina taglia sin supplements per uffants e sin supplements da scolaziun»,

suenter avair gi invista da la missiva dal Cussegl federal dals 23 d'october 2013³,
concluva:

Art. 1

¹ L'iniziativa dal pievel dals 5 da november 2012 «Sustegnair las famiglias! Nagina taglia sin supplements per uffants e sin supplements da scolaziun» è valaivla e vegn suittamessa a la votaziun dal pievel e dals chantuns.

² L'iniziativa ha il suandard text:

La Constituziun federala vegn midada sco suonda:

Art. 116 al. 2 seconda frasa (nov)

² ... Ils supplements per uffants ed ils supplements da scolaziun èn libers da taglia.

Art. 2

L'Assamblea federala recumonda al pievel ed als chantuns da refusar l'iniziativa.

¹ CS 101

² Fegl uffizial federal 2013 243

³ Fegl uffizial federal 2013 8461

Ils arguments dal comité d'iniziativa

Nagina taglia sin supplements per uffants e sin supplements da scolaziun – gea a l'iniziativa dal pievel

Famiglias ston purtar grondas chargias finanzialas. Supplements per uffants e supplements da scolaziun duain mitigiar questa chargia supplementara. **Actualmain pon famiglias profitar mo per part da quest sustegn finzial:** Perquai ch'ils supplements vegnan suttamess sco entradas cumplainamain a la taglia, retorna circa in tschintgavel da quests daners immediatamain en la cassa publica. Quai è absurd.

L'iniziativa vul metter ina fin a quest augment nungiustifitgà da l'entrada suttamessa a la taglia. Ella distgorgia las famiglias immediatamain, independentamain dal model da vita u da gudogn tschernì. Ils supplements per uffants ed ils supplements da scolaziun stattan cumplainamain a disposiziun a las famiglias. **Uschia vegn rinforzada lur capacitat da cumpria.**

Famiglias che pajan paucas taglias profitan er, perquai ch'ellas pon cumprovar entradas pli bassas che vegnan suttamessas a la taglia. Quai las gida a survegnir plitgunsch reducziuns per entradas bassas (reducziun da las premias, stipendis e.u.v.). Pli bassas che las entradas suttamessas a la taglia èn e pli fitg che las famiglias profitan – e quai sentan ellas bain.

Exempels da calculaziun¹ per in pèr maridà cun dus uffants (da 12 e 17 onns)

Entrada suttamessa a la taglia chantunala	Berna		Losanna	
50 000 francs	oz: cun supplements	intent da l'iniziativa: senza supplements	oz: cun supplements	intent da l'iniziativa: senza supplements
	56240	50 000	56360	50 000
Taglias da pajar	9368	8055	6432	5373
Respargn grazia a la liberaziun da taglia	1313 francs		1059 francs	
70 000 francs	oz: cun supplements	intent da l'iniziativa: senza supplements	oz: cun supplements	intent da l'iniziativa: senza supplements
	76240	70 000	76360	70 000
Taglias da pajar	14257	12717	9984	8806
Respargn grazia a la liberaziun da taglia	1540 francs		1178 francs	

¹ Funtauna: calculatur da taglia da l'Administraziun federala da taglia (2013)

Cun acceptar l'iniziativa distgorgiais Vus nossas famiglias!

Ulteriuras infurmaziuns sin www.familieninitiativen.ch

Ils arguments dal Cussegl federal

La promozion da las famiglias ha ina gronda impurtanza per il Cussegl federal. Da questa iniziativa profitassan dentant en emprima lingia famiglias cun uffants e cun entradas autas; famiglias cun pitschnas entradas n'avessan percuter strusch in avantatg u na profitassan insumma betg. Plinavant resultassan grondas perditas da taglia per la Confederaziun, per ils chantuns e per las vischnancas. Il Cussegl federal refusa il project, oravant tut per ils sustants motivs:

La promozion da las famiglias sa lascha realisar il meglier en moda directa, per exemplu cun reducir las premias da las cassas da malsauns per ils uffants u cun contribuziuns finanzialas per la tgira d'uffants cumplementara a la famiglia. Diversas mesiras fiscals cumpletteschan quest sustegn cun in effect concret: Circa la mesadad da las chasadas cun uffants na paja pli nagina taglia federala directa.

Sche l'iniziativa vegniss acceptada, profitassan principalmain las famiglias cun uffants e cun entradas autas. Famiglias che pajan oz paucas u naginas taglias sin las entradas n'avessan percuter strusch in avantatg u na profitassan insumma betg. Er las persunas che vivan sueltas en ina chasada – quai ch'è oz dapli ch'in terz da tut las chasadas privatas en Svizra – na profitassan betg d'ina distgargia. La curta tirassan per finir er tut las chasadas da pàrs senza uffants.

Supplements per uffants e supplements da scolaziun augmentan las entradas ed uschia la capacidat economica. Perquai èn els suttamess a la taglia. Sch'i dess in'excepziun da quest princip central da l'imposiziun da taglia per ils supplements per uffants ed ils supplements da scolaziun, ristgassan da suandar bainbaud pretensiuns per ulteriuras

La promozion actuala da las famiglias è sa cumprovada

Tgi gudagnass e tgi perdess, sche l'iniziativa vegniss acceptada?

Betg metter en dumonda la giustia fiscale

liberaziuns da taglia. Adina dapli liberaziuns da taglia mettesan dentant en dumonda la giustia fiscala, la libertad finanziala dal maun public vogniss restrenschida e la coesiun sociala fissa periclitada.

Sche l'iniziativa vogniss acceptada, resultassan perditas da taglia da circa 1 milliarda francs ad onn per la Confederaziun, per ils chantuns e per las vischnancas. Questas perditas stuessan veginir cumpensadas. Co che quai duess succeder, na respunda l'iniziativa betg. Sch'i duvrass mesiras da spargn per cumpensar las perditas da taglia, n'èsi betg exclus che quellas tangassan er famiglias cun uffants. Per ellas pudess l'iniziativa a la fin dals quints schizunt avair consequenzas negativas.

Per tut queste motivs recumondan il Cussegli federal ed il parlament da refusar l'iniziativa «Sustegnair las famiglias! Nagina taglia sin supplements per uffants e sin supplements da scolaziun».

Privel da tagliar en
l'atgna charn

Iniziativa dal pievel «Taglia sin l'energia empè da la taglia sin la plivalur»

La dumonda da votaziun è:

Vulais Vus acceptar l'iniziativa dal pievel «**Taglia sin l'energia
empè da la taglia sin la plivalur**»?

**Il Cussegl federal ed il parlament recumondan da refusar
l'iniziativa.**

Il Cussegl naziunal ha refusà l'iniziativa cun 171 cunter
27 vuschs senza abstensiuns, il Cussegl dals chantuns cun
40 cunter 3 vuschs e cun 2 abstensiuns.

Il pli impurtant en furma concisa

Il pretsch d'electricitat, da benzin u d'ielie da stgaudar po influenzar noss cumportament. Per exemplu po in augment dal pretsch dal benzin avair per consequenza che nus cumprain in auto pli spargnus u che nus midain al traffic public. Ed in aut quint d'electricitat po esser il motiv da stizzar consequentiamen ils apparats che nus na duvrain betg. Quai vala tant per chasadas sco er per interpresas. Taxas sin l'electricitat, sin combustibels e sin carburants pon perquai avair in effect directiv e servan uschia sco instruments efficazis a consumar energia en moda pli spargnusa ed a reducir las emissiuns da substanzas nuschaivlas en l'aria.

Situaziun da partenza

L'iniziativa vul introducir ina taglia sin purtaders d'energia betg regenerabels sco ieli mineral, gas, charvun u uran. A medem temp duai veginr abolida la taglia sin la plivalur. La taglia sin l'energia duai esser uschè auta, ch'i pon veginr realisadas las medemas entradas sco ozendi cun la taglia sin la plivalur.

Tge vul l'iniziativa?

En l'avegnir vul il Cussegl federal dar dapli pais a taxas finanzielas per cuntanscher las finamiras climaticas ed energeticas da la Svizra. Las lavurs respectivas èn gia instradadas. Or dal puntg da vista economic e social èsi dentant irresponsabel da remplazzar la taglia sin la plivalur tras ina taglia sin l'energia entaifer paucs onns. Cun actualmain passa 22 milliardas francs per onn è la taglia sin la plivalur la funtauna d'entradas la pli impurtanta da la Confederaziun. Ella daventa plinavant er adina pli impurtanta per las assicuranzas socialas. Per la remplazzar, stuessan veginr incassadas tariffas da taglia fitg autas sin l'energia. Las tariffas da taglia stuessan ultra da quai veginr augmentadas permanentamain, perquai ch'il consum d'energias betg regenerablas sa reduciss pervia da l'effect directiv da la taglia. Quai chaschunass ina chargia supplementara per l'economia e per la mastergnanza. Ultra da quai fissan las chasadas cun entradas bassas pertutgadas en moda sproporziona da. Per tut queste motivs recumondan il Cussegl federal ed il parlament a las votantas ed als votants da refusar l'iniziativa.

Puntg da vista dal
Cussegl federal e dal
parlament

Il project da votaziun en detagi

L'iniziativa pretenda l'introducziun d'ina taglia sin pertaders d'energia betg regenerabels sco ieli mineral, gas, charvun u uran. La taglia duai vegnir incassada tar l'import u tar la producziun da l'energia en Svizra. La consequenza fiss che l'ielis da stgaudar, il benzin u l'electricitad dad ovras atomaras daventassan marcantamain pli chars. Ils pretschs pli auts duain effectuar ch'i vegnia consumada main energia betg regenerabla e ch'i vegnia produci main gas cun effect da serra. Energias regenerablas sco la forza idraulica u l'electricitad solara na fissan betg pertugadas da la taglia.

L'iniziativa vul introducir ina taglia sin l'energia ...

Sco cuntramesira da l'introducziun da la taglia sin l'energia propona l'iniziativa dad abolir la taglia sin la plivalur. Quai, per evitar che la chargia fiscal da la populaziun e da las interpresas na s'augmentia betg tut en tut. L'autezza da la taglia sin l'energia duai vegnir fixada uschia, che las entradas che vegnan generadas tras ella èn precis uschè autas sco ils retgavs da la taglia sin la plivalur en la media dals ultims 5 onns.

... ed abolir la taglia sin la plivalur

La taglia sin la plivalur vegn incassada sin quasi tut la rauba consumada e sin quasi tut ils servetschs duvrads en Svizra. La tariffa normala importa 8 percents.¹ Ils retgavs da la taglia sin la plivalur han importà 22,6 milliardas francs l'onn 2013, damai dapli ch'in terz da las entradas da la Confederaziun. Cun quai presta la taglia sin la plivalur ina contribuziun impurta per finanziar las incumbensas publicas sco la furmaziun e la perscrutaziun, la defaisa naziunala e l'infrastructura da traffic. Ina part dals retgavs fiscals è liada tras la lescha ad in

La funcziun da la taglia sin la plivalur

¹ Per bains dal diever quotidian (p.ex. victualias, medicaments e cudeschs) vegn appligtada la tariffa reducida da 2,5 percents. Per l'hotellaria vala la tariffa speziala da 3,8 percents.

intent e vegn impundida per finanziar tschertas incumbensas:
L'onn 2013 èn per exempl vegnids duvrads 2,8 milliardas
francs per la AVS e passa 1 milliarda francs per la AI.

Cuntrari a la taglia sin la plivalur pertutgass la taglia sin l'energia mo fitg paucs bains, particularmain l'iel mineral, il gas, il charvun e l'uran. Per generar las medemas entradas sco tar la taglia sin la plivalur, stuessan vegnir incassadas taglias fitg autas sin quests bains. Igl è fitg difficil da far prognosas precisas davart las consequenzas da l'iniziativa. En sia missiva al parlament fa il Cussegl federal quint che la taglia sin l'energia avess d'importar inqual onns suenter sia introduczion circa 33 raps per ura da kilowatt energia primara respectivamain 3,3 francs per liter ieli da stgaudar e circa 3 francs per liter benzin.² Pretschs uschè auts dastgassan avair per consequenza che chasadas ed interpresas reducissan fermamain lur consum d'energia da funtaunas betg regenerablas.

Pervia da l'effect directiv, pia perquai ch'il consum d'energia sa diminuiss pervia da la taglia, sa reducissan er las entradas fiscales. Per consequenza stuessan però vegnir augmentadas las tariffas da taglia sin l'energia permanentamain per cuntanscher entradas da la medema autezza sco quellas da las entradas fiscales. I n'è dentant betg cler, sch'i pon uschia vegnir cuntanschids retgavs ch'en gronds avunda er a media ed a lunga vista. Sche las entradas sa sbassassan, stessan a disposiziun damain meds a las assicuranzas socialas ed a la Confederaziun per finanziar lur incumbensas.

Las tariffas da taglia
sin l'energia fissan
fitg autas

Augment regular da
la taglia sin l'energia

² Funtauna: missiva dals 20 da november 2013 tar l'Iniziativa federala dal pievel «Taglia sin l'energia empè da la taglia sin la plivalur»; Fegl uffizial federal 2013 9025, particularmain 9048.

L'iniziativa preveda differentas mesiras per impedir che interpresas en Svizra veggan disfavurisadas en confront cun la concurrenza da l'exterior pervia da la taglia sin l'energia. Las interpresas che dovràn blera energia pudessan perquai schizunt vegin deliberadas da la taglia sin l'energia u stuessan pajar mo ina taxa reducida. Plinavant fissi previs che la taglia vegin restituida, sche l'energia vegin exportada e che l'uschenumnada energia grischa³ vegin suttamessa ad ina taxa tar l'import da products. Quai che na fiss però strusch betg realisable ord vista actuala en il rom da las obligaziuns internaziunalas da la Svizra (dretg mundial da commerzi).⁴ In sistem per taxar l'energia grischa chaschunass en mintga cas blera lavur administrativa e gronds custs.

Mesiras dispitaivas
per mitigiar las
consequenzas

L'export è deliberà da la taglia sin la plivalur. Ils pretschs dals products exportads n'èn pia betg suttamess a la taglia sin la plivalur. L'introducziun da la taglia sin l'energia e l'aboliziun da la taglia sin la plivalur stgaffiss ina nova situaziun: Interpresas, en spezial firmas exportadoras, avessan da purtar gronds custs energetics ch'ellas na pudessan betg egualisar cun augmentar ils pretschs. Perquai fissan ellas dischavantagiadas en la concurrenza cun firmas da l'exterior.

Dischavantatgs
per interpresas en
la concurrenza
internaziunala

Las chasadas privatas fissan pertutgadas differentamain, sche la taglia sin la plivalur vegin remplazzada tras ina taglia sin l'energia.⁵ Sch'ils pretschs da l'electricitat, da l'ielo da stgaudar, dal benzin e d'auters products e servetschs s'augmentassan pervia da la taglia sin l'energia, avess quai consequenzas pli grondas en moda proporziunala per la cassa da chasadas cun entrads pitschnas che per chasadas cun entradas grondas.

Las entradas pli
bassas fissan
pertutgadas pli ferm

³ L'energia grischa è quella energia che vegin duvrada per producir, per transportar, per depositar, per vender e per dismetter in product.

⁴ Funtauna: missiva dals 20 da november 2013 tar l'Iniziativa federala dal pievel «Taglia sin l'energia empè da la taglia sin la plivalur»; Fegl uffizial federal **2013** 9025, particularmain 9057 e 9059 ss.

⁵ Funtauna: missiva dals 20 da november 2013 tar l'Iniziativa federala dal pievel «Taglia sin l'energia empè da la taglia sin la plivalur»; Fegl uffizial federal **2013** 9025, particularmain 9052 s.



Text da votaziun

Conclus federal

davart l'iniziativa dal pievel

«Taglia sin l'energia empè da la taglia sin la plivalur»

dals 26 da settember 2014

L'Assamblea federala da la Confederaziun svizra,

sa basond sin l'artitgel 139 alinea 5 da la Constituziun federala¹,

suerter avair examinà l'iniziativa dal pievel

ch'è vegnida inoltrada ils 17 da december 2012² «Taglia sin l'energia empè da la

taglia sin la plivalur»,

suerter avair gi invista da la missiva dal Cussegl federal dals 20 da november 2013³,

concluda:

Art. 1

¹ L'iniziativa dal pievel dals 17 da december 2012 «Taglia sin l'energia empè da la taglia sin la plivalur» è valaivla e vegn puttamessa a la votaziun dal pievel e dals chantuns.

² L'iniziativa ha il suandard text:

I

La Constituziun federala vegn midada sco suonda:

Art. 130a (nov) Taglia sin l'energia

¹ La Confederaziun po incassar ina taglia sin l'import e sin la producziun en Svizra d'energia nunregenerabla. Sche l'energia vegn exportada, vegn restituida la taglia. La taglia vegn calculada per ura da kilowatt d'energia primara.

² Per evitar distorsions considerablas da concurrenza po la lescha prevair ina taglia sin l'energia grischa.

³ La tariffa da taglia vegn determinada uschia ch'il retgav da taglia correspunda ad ina procentuala fixa dal product naziunal brut.

⁴ Per ils singuls purtaders d'energia pon vegnir determinadas differentas tariffas da taglia sin fundament da lur bilantscha ecologica generala.

⁵ Per evitar distorsions considerablas da concurrenza e per simplifitgar l'incassament da la taglia po la lescha prevair excepziuns d'ina imposizion da taglia cumpleta.

¹ CS 101

² Fegl uffizial federal 2013 617

³ Fegl uffizial federal 2013 9025



Iniziativa dal pievel «Taglia sin l'energia empè da taglia sin la plivalur»

6 Sche la finanziaziun da l'assicuranza per vegls, survivents ed invalids n'è betg pli garantida pervia dal svilup da la structura da vegliadetgna, po veginir duvrà maximally 13,1 pertschient dal retgav da taglia per quai.

7 5 pertschient dal retgav betg lià ad in intent vegin impundi per la reducziun da las premias en l'assicuranza da malsauns a favur da las classas d'entradas bassas, sch'i na vegin betg fixada tras la lescha in'autra utilisaziun per distgargar las classas d'entradas bassas.

II

Las disposiziuns transitoricas da la Constituziun federala veginan midadas sco suonda:

Art. 196 cifra 3 al. 2 lit. ebis (nov)

3. Disposiziun transitorica tar l'art. 87 (Viafiers ed ulteriurs medis da traffic)

2 Per finanziar gronds projects da viafier po il Cussegl federal:

ebis. duvrar 1,5 pertschient dal retgav da la taglia sin l'energia tenor l'artitgel 130a;

Art. 197 cifra 9⁴ (nov)

9. Disposiziun transitorica tar l'art. 130a (Taglia sin l'energia)

1 Cun l'entrada en vigur da la legislaziun tar l'artitgel 130a, il pli tard dentant ils 31 da december dal 5avel onn suenter sia acceptaziun:

a. veginan abolids ils artitgels 130, 196 cifra 3 alinea 2 litera e sco er 196 cifra 14;

b. vegin midà l'artitgel 134 sco suonda:

Art. 134 Exclusiun da la taxaziun chantunala e communalala

1 Quai che la legislaziun federala suttametta a las taglias spezialas da consum, a la taglia da bul ed a la taglia anticipada ubain declera sco liber da taglia, na dastgan ils chantuns e las vischnancas betg engrevgiar cun taglias da medem gener.

2 La procentuala fixa dal product naziunal brut en l'artitgel 130a alinea 3 vegin determinada uschia ch'il retgav da la taglia sin l'energia correspunda al retgav medi da la taglia sin la plivalur dals ultims 5 onns avant sia abolizion.

3 Sche la legislaziun tar l'artitgel 130a n'entra betg en vigur il pli tard il 1. da schanner dal 6avel onn suenter l'acceptaziun da tal, regla il Cussegl federal ils detagls.

Art. 2

L'Assamblea federala recumonda al pievel ed als chantuns da refusar questa iniziativa.

4 La cifra definitiva da questa disposiziun transitorica vegin fixada da la Chanzlia federala suenter la votaziun dal pievel.

Ils arguments dal comité d'iniziativa

Garantir la vieuta energetica – L'iniziativa procura finalmain per giustia tar las chaschunadras ed ils chaschunaders e per transparenza dals custs tar l'energia. Ella rinforza las energias regenerablas e garantescha uschia che nus possian sortir da l'energia nucleara senza donnegiar l'economia ni il clima.

Remunerar in comportament ecologic e reducir la lavur birocratica

Las consumentas ed ils consumenti vegnan distgargiads da la taglia sin la plivalur malgista, incassada sin tut ils products e sin tut las cumpras, ed il consum ecologic vegn remunerà finanzialmain. Per l'economia e per las passa 300 000 interpresas pitschnas e mesaunas (IPM) vegn reducida la lavur birocratica massivamain grazia a l'aboliziun da la taglia sin la plivalur.



Martin Bäumle, president da la partida verd-liberala da la Svizra:

«L'iniziativa è la via roiala per realisar la vieuta energetica: efficazia, liberala, senza subvenziuns e senza regulaziuns birocraticas.»

Rinforzar las interpresas svizras e reducir la dependenza da l'exterior

L'iniziativa rinforza las interpresas innovativas ed augmenta la valurisaziun en Svizra. La dependenza da l'ielo mineral, dal gas e da l'uran da regiuns malsegiras ed instabilas vegn reducida e la segirezza dal provediment vegn augmentada. Investin noss daners en l'avegnir da la Svizra empè da pajer milliardas a l'exterior.



Babette Sigg Frank, presidenta dal forum da consumentas e da consumenti kf:

«Cun l'iniziativa vegn remunerà in consum duraivel e per las consumentas ed ils consumenti èsi pli simpel da surpigliar lur responsabludad.»

Garantir las entradas dal stadi – La taglia sin l'energia garantescha en l'artitgel constituzional entradas tuttina grondas sco quellas che derivan oz da la taglia sin la plivalur. Er la finanziaziun da las ovras socialas, da las reduzioni da las premias ed er da l'infrastructura da vialier è garantida sco fin ussa.

Ulteriuras infurmaziuns sin www.energiestattmehrwertsteuer.ch

Ils arguments dal Cussegl federal

Il Cussegl federal vul reducir las emissiuns da gas cun effect da serra ed il consum d'energia. El considerescha che taxas finanzialas èn in instrument raschunaivel per cuntanscher questa finamira. Il Cussegl federal è però cunter in remplazzament da la taglia sin la plivalur tras ina taglia sin l'energia. Quai periclitass la finanzzaziun a lunga vista da las incumbens federalas. Il Cussegl federal refusa il project oravant tut per ils sustants motivs:

La taglia sin la plivalur è cun passa 22 milliardas francs per onn la funtauna d'entradas la pli impurtanta da la Confederaziun. Ella è fidada e bain planisabla. I fiss ristgà da remplazzar la taglia sin la plivalur tras ina taglia sin l'energia. Pervia da l'effect directiv d'ina auta taglia sin l'energia, sa reduciss il consum d'energia betg regenerabla en moda marcanta. La taglia sutminass uschia sia atgna basa. A lunga vista na fiss la finanzzaziun da las incumbens federalas betg pli garantida.

L'iniziativa pretenda che l'autezza da la taglia sin l'energia sa drizzia tenor las entradas da la taglia sin la plivalur. Il resultat fissan tariffas da taglia fitg autas sin pertadars d'energia betg regenerabla che stuessan vegnir augmentadas permanentamain anc vinavant pervia dal regress dal consum d'energia. Quai na considerescha il Cussegl federal betg sco raschunai-vel. Taglias uschè autas n'èn betg necessarias per reducir ils gas cun effect da serra ed il consum d'energia.

Experiment privlus
per la politica
da finanzas

Pretschs fitg auts
per l'energia

Cun la Strategia d'energia 2050 persequitescha il Cussegl federal in'autra e meglra via per dumagnar en moda pli effizienta la dumonda da l'energia, per rinforzar l'utilisaziun d'energias regenerablas e per realisar la sortida da l'energia nucleara en ina moda che tegna quint dal clima. Per quest intent prevesa el a partir da l'onn 2021 in sistem directiv che remplazza pass per pass las mesiras da promozion actualas per energias regenerablas e per sanaziuns d'edifizis. Quest sistem directiv sa basa sin taxas sin l'electricitat, sin combustibels ed eventualmain er sin carburants e duai vegin realisà en ina moda economicamain e socialmain supporatabla. Il project da consultazion vegn a vegin preschentà proximamain.

La Strategia d'energia
2050 maina pass per
pass a la finamira

L'iniziativa vul percuter sfurzar tras ina midada precipitada dal sistem energetic e remplazzar per quest intent la taglia sin la plivalur tras ina taglia sin l'energia fitg auta entaifer 5 onns. Il privel che quai chasschunia ina crisa economica cun ina dischoccupaziun bler pli gronda na po betg vegin exclus. En general avessan las interpresas ina posiziun main buna, en spezial manaschis exportants da l'industria da maschinas e d'autras branschas che dovrano blera energia.

La vieuta energetica
cun il palfier

L'iniziativa avess dischavantatgs sproporzionads per las chasadas cun entradas pitschnas. Pretschs pli auts per electricitat, per ieli da stgaudar, per benzin e per ulteriurs products e servetschs strapatschassan pli fitg lur cassas che las cassas da las chasadas cun entradas pli grondas. Gnanc la taglia sin la plivalur na pudess compensar questa chargia supplementara.

Chargia sproporzionada
per chasadas cun
entradas pitschnas

Per tut questis motivs recumondan il Cussegl federal ed il parlament da refusar l'iniziativa «Taglia sin l'energia empè da la taglia sin la plivalur».

**PP
Spediziun postala**

Trametter enavos a la controlla
d'abitants da la vischnanca

**Recumandaziun
a las votantas ed als votants**

Il Cussegli federal ed il parlament
recumondan da votar ils 8 da mars 2015
sco suonda:

- Na a l'iniziativa dal pievel
«Sustegnair las famiglias! Nagina
taglia sin supplements per uffants
e sin supplements da scolaziun»
- Na a l'iniziativa dal pievel «Taglia
sin l'energia empè da la taglia sin
la plivalur»

Fin da redacziun:
19 da november 2014

868002513

Ulteriuras infurmaziuns sin:
www.admin.ch
www.parlament.ch
www.ch.ch

Edì da la Chanzlia federala